

ՀՐԱՆՏ ՕՀԱՆՅԱՆ

Պատմական գիտ. թեկնածու, ՄՄ

ՎԻՐԱՅԱՅՈՑ ԹԵՍԱԿԱԼ ԱՌԱՋՆՈՐԴ ՆԵՐՍԵՍ ԱՇՏԱՐԱԿԵՑՈՒ ԵՒ ԲԵՅԲՈՒԹՅԱՆՆԵՐԻ ՉԱԿԱՍԱՐՏՈՒԹՅԱՆ ՉԱՐՅԻ ՇՈՒՐՁ¹

ՆԱԽԱԲԱՆ

1814–1828 թթ. Ներսես Աշտարակեցին (Ամենայն Հայոց կաթողիկոս 1843–1857 թթ.) առաջնորդել է Վիրահայոց թեմը²: Նրա թեմակալության առաջին տարիները, սակայն, ուղեկցվել են տեղի համայնքի որոշ ներկայացուցիչների հետ ունեցած տարաձայնություններով եւ անգամ սուր հակասություններով, ինչը լայն արձագանք էր գտել ռուսահայ իրակալության մեջ: Թեեւ այդ իրադարձություններին անդրադարձել է Ժ. դարի հայ նշանավոր պատմաբան Ալեքսանդր Երիցյանը (1841–1902)³, օգտագործելով արխիվային մեծաքանակ վավերագրեր, բայց եւ այնպես մեր ուսումնասիրությունների ընթացքում ուշադրություն գրավեցին մի շարք վավերագրեր, որոնք, կարծում ենք, ամբողջացնում են այդ հակամարտության ընդհանուր պատկերը⁴: Դրանք, մասնավորապես, հայոց կաթողիկոսին, ռուս կառավարչապետին, ռուսահայ հայտնի գործիչներին եւ Երեւանի խանին հասցեագրված նամակներն են, որոնք փաստագրական հարուստ նյութ են բովանդակում: Այդ նամակներում Ներսես Աշտարակեցին հաղորդում է ուշագրավ մանրամասներ, որոնք սկզբնաղբյուրային կարեւոր տեղեկություններ են պարունակում խնդրո առարկա հարցի վերաբերյալ, ինչպես նաեւ բացահայտում են թեմակալի գործադրած ջանքերը վիրահայոց համայնքի պառակտումը վերացնելու եւ խա-

¹* Ստացվել է 23.05.2023, գրախոսվել է 30.05.2023: էլ. հասցե՝ h.ohanyan@matenadaran.am:

² Մ. Ա. Ք. ՕՐՄԱՆԵԱՆ, Ազգապատում, հտ. Գ., Սբ. էջմիածին, 2001, սյունակ 3947–3948:

³ Այդ հակամարտությունը, «հետզհետե մեծանալով, դարձաւ մի սարսափելի կռիւ, ոչ պակաս, քան Դաւիթ-Դանիէլեան շփոթը» (տե՛ս Ա. ԵՐԻՑԵԱՆ, Ամենայն Հայոց կաթողիկոսութիւնը եւ Կովկասի Հայք XIX դարում, Մասն Ա. (1800–1832 թթ.), Թիֆլիս, 1894, էջ 74):

⁴ «Մեր մեծաքանակ ժողովածուի մէջ գտնվում են մօտ 200 գրութիւններ, որոնք վերաբերում են այդ կռուին».— գրում է Ա. Երիցյանը՝ նշելով նաեւ, որ իրեն չի հաջողվել անդրադառնալ բոլոր վավերագրերին (տե՛ս Ա. ԵՐԻՑԵԱՆ, նշ. աշխ., էջ 75):

ղաղություն հաստատելու ուղղությամբ: Հստ այդ վավերագրերի՝ Ներսես Աշտարակեցին Եփրեմ Ա. Ձորագեղցի կաթողիկոսի աջակցությամբ փորձել է բարենորոգել հոգեւոր-եկեղեցական գործերը թեմի ներսում, իսկ ռուսահայ գործիչների միջոցով փորձել է ազդել Բեհբուխյանների վրա:

Ա. ՀԱԿԱՄԱՐՏՈՒԹՅԱՆ ԷՈՒԹՅՈՒՆԸ.

ՆԵՐՍԵՍ ԱՇՏԱՐԱԿԵՑՈՒ ՆԱՄԱԿՆԵՐԸ ՀԱՅՈՑ ԿԱԹՈՂԻԿՈՍ

ԵՓՐԵՄ Ա. ՁՈՐԱԳԵՂՑՈՒՆ

Համայնքի հոգեւոր գործերում Ներսես Աշտարակեցու հաստատակամ քայլերը եւ ռուսական իշխանությունների պահանջով սկսված եկեղեցական գույքի հաշվառումը թեմակալի դեմ են տրամադրում վրացահայ ազգեցիկ իշխաններին՝ Բեհբուխյանների գլխավորությամբ⁵: Հակասություններն սկսվում են Թիֆլիսի Նորաշեն եկեղեցու իրադարձություններով⁶: Բացի այդ՝ օգտվելով ռուսական իշխանությունների առաջադրած պահանջներից՝ Ներսես Աշտարակեցին սկսում է հաշվառել եկեղեցական հասույթները՝ ներկայացնելով այն որպես եկեղեցու բարօրությանն ուղղված քայլ, մինչդեռ գույքագրման հարցում նրա հակառակորդներն օգտագործում են այդ պարագան՝ թեմակալ առաջնորդին մեղադրելու համար⁸:

Անդրադառնալք որոշ նամակների, որոնք բացահայտում են թեմակալի գործունեության կարեւոր դրվագները: Այսպես՝ 1816 թ. մայիսի 3-ին, երբ համայնքում հակասությունները դեռեւս բորբոքված չէին, Ներսես Աշտարակեցին եկեղեցական մի կարեւոր բարեփոխում է նախաձեռնում, որի առնչությամբ ծավալուն գրություն է ուղարկում Հայոց կաթողիկոս Եփրեմ Ա. Ձորագեղցուն՝ ամենայն մանրամասնությամբ ներկայացնելով թեմում տիրող վիճակը եւ շարադրելով բարեփոխումներին առնչվող իր մոտեցումները:

⁵ Բեհբուխյանների նշանավոր տոհմը՝ Վրացական թագավորությունում ժառանգաբար վարել է Թիֆլիսի կառավարչի պաշտոնը, իսկ Ռուսական կայսրությունում հայտնի էին անվանի ռազմական գործիչներ Վասիլ եւ Դավիթ Բեհբուխյանները:

⁶ Թիֆլիսի Նորաշեն եկեղեցու ավագ քահանա տեր Հակոբի մահից հետո պայքար է սկսվում՝ նրա ծուխն առաջնորդելու հարցի հետ կապված: Այդ պայքարին միջամտում են Բեհբուխյանները՝ միջնորդելով թեկնածուներից մեկի օգտին (տե՛ս Ա. ԵՐԻՑԵԱՆ, նշ. աշխ., էջ 100–101):

⁷ Տե՛ս В. Тунян, Католикос всех Армян Епрем I Дзорагехци (1809–1830), Св. Эчмиадзин, 2018, էջ 87:

⁸ Անդ, էջ 102:

Նա անդրադառնում է եկեղեցական հասույթների հավաքագրման գործին՝ նկարագրելով Գորի քաղաքում իր ունեցած դժվարությունները. «....նախ յամառեալ մնան, թէ օրէնք նուիրականութեան է մի անգամ յ՛ տարուջ եւ ոչ կանուխ, քան զայն եւ այսպիսեօք ահա պարտաւորեալ ի հոգն մշակութեան»⁹: Ապա գրում է, որ իրեն ի վերջո հաջողվել է «....զմինն յառաջ ընծայել՝ ձերամբ քահանայապետական բարձրութենէ, զի որպէս եւ պատշաճին իցէ՝ մշակեսցի բարձրագոյն ձերով զօրութեամբ»¹⁰: Այդ ընթացքում Թիֆլիսում տեղի են ունենում Նորաշեն եկեղեցու նշված դեպքերը, ինչի վերաբերյալ եւ Ներսես Աշտարակեցին մանրամասն տեղեկացնում է կաթողիկոսին¹¹: Սակայն, ինչպես նկատվում է նամակից, Բեհբուխյանների միջամտութեան պատճառով թեմակալին չի հաջողվել լուծել այդ խնդիրը: Ուստի նման դեպքերը բացառելու եւ խնդիրը կանոնավորելու նպատակով Ներսես Աշտարակեցին ճիշտ էր համարում կաթողիկոսական կոնդակ ստանալը. «Հարկ է, զի գրութիւն ձեր գրեսցէ զկոնդակ համաձայն կանոնաց, թէ զիարդ զժողովուրդն Աստուծոյ եւ եկեղեցւոյ սրբոյ նորա յանդգնի քահանայն անուանել իւր ժառանգութիւն եւ զիարդ համարձակի կտակել ըստ հաճոյս իւր այլոց զժողովուրդն, որ պատկանեալ է միմիայն Աստուծոյ»¹²: Դա նշանակում էր, որ այդ դեպքում ծուխը փոխանցելու հարցը կորոշվեր ոչ այլ կերպ, քան թեմակալի համապատասխան նշանակմամբ, իսկ դա կնպաստեր այն բանին, որ համայնքը զերծ կմնար նման իրավիճակներից:

Շարունակելով կաթողիկոսին ներկայացնել հոգեւոր թեմի հետ կապված խնդիրները եւ նկատի ունենալով Նորաշենի միջադեպը՝ Ներսես Աշտարակեցին պնդում է. «....զի խափանեալ եղիցի այս հնացեալ անկանոն սովորութիւն»։ Թեմակալի մոտեցումը այդ հարցում միանշանակ էր. հոգեւորականները պետք է նշանակվեին բացառապես ըստ իրենց արժանիքների, ինչի մասին նա գրում է կաթողիկոսին. «Քահանայ, որ ուսուցանէ զորդին իւր ըստ արժանի քահանայութեան եւ գտցի նա արժանաւոր քահանայութեան, ժառանգեսցէ փոխանակ հօր իւրոյ ի պաշտօնի քահանայութեան զարդիւնսն ժողովրդոյ, իսկ եթէ չիցէ արժանաւոր որդին քահանայի, ժառանգեսցէ արժանաւորն այլ, զի թէ քա-

⁹ ՄՄ, Ալ. Երիցյանի արխիվ, թղթ. 159, վավ. 117, թ. 1ա:

¹⁰ Անդ, թ. 1բ:

¹¹ ՄՄ, Ալ. Երիցյանի արխիվ, թղթ. 159, վավ. 117, թ. 2ա–2բ:

¹² Անդ, թ. 3ա:

հանայապետ զիւր քահանայապետութիւն եւ եպիսկոպոսք զիւրեանց եպիսկոպոսութիւնն ոչ կարողանան իբրեւ զիւրեանց ժառանգութիւն թողուլ մերձաւորաց»¹³:

Պետք է նկատել, որ թեմակալ առաջնորդի այդ հետեւողականությունը հանգեցրեց Բեհրուժյանների հետ հակասությունների հետագա խորացմանը¹⁴: Թեեւ Աշտարակեցին չէր ընկրկում իր դիրքորոշումներում, այդուհանդերձ, ակնկալում էր հայոց կաթողիկոսի աջակցությունը, քանի որ առանց դրա բարեփոխումներ նախաձեռնելը իրատեսական լինել չէր կարող: Եւ դրա համար նա գրում է. «...եթէ այս կոնդակ արժան համարեսցիք գրել, ինձ թուի, թէ բազում պայծառութեանց եկեղեցւոյն եւ բարեկարգութեանց ժողովրդական կառավարութեանց եղիցի դիւրութիւն, իսկ թէ ոչ, որպէս հաճոյ գուցէ Ձեր տէրութիւն, այն է փառաւորն»¹⁵: Բայց դա դեռ ամենը չէ. այդ հարցում նա մտադիր էր ստանալ նաեւ ռուսական իշխանությունների հավանությունը: Ներսէս Աշտարակեցին տեղեկացնում էր վեհափառին, որ «...ըստ կարգի այլոցն, պահանջեցեալ ի կնեազ Գօլիցիինէն, պարտաւորիմ ես նմա եւս յայտնել»¹⁶:

Ինչպես երեւում է 1816 թ. հունիսի 15-ին Եփրեմ կաթողիկոսին հղված նամակից, թեմակալը, կարծես, բնավ չէր կանխատեսում Բեհրուժյանների հետ հակասությունների հետագա սրումը: Համենայնդեպ՝ Թիֆլիսի հետ կապված անհանգստության նշույլներ անգամ չկան այդ նամակում: Ընդհակառակը՝ նրան ավելի շատ մտահոգում էին իրեն վստահված ընդարձակ թեմի գործունեության առնչվող մյուս վիճահարույց հարցերը. «Մինչեւ ցայժմ բարւոք խաղաղութեամբ համահաւաքեալ գտումար վասն ամենայն յանձնեցելոցն մեզ Վրաստանու, Ղազարու, Շամշադինայ եւ էլիսավէտապօլսոյ կողմանցն, օտարականաց Փամպակու կողմանց եւս ակն ունիմ ստանալ ի տէր Ղազարէն եւ փութամ ոչ անագան ստանալ եւ առաքել եպիսկոպոսի վիճակինն եւ այնպէս յետ 15-ին օգոստոսի գնալ ի Կախէթ եւ անդ եւս պատրաստել, կանխաւ վերադառնալ աստէն եւ յօրինել զպատասխան կնիազ Գալիցիինն եւ այնուհետեւ ազատակամ դիմել ի կողմանս էլիսավէտապօլսոյ»¹⁷: Սակայն,

¹³ ՄՄ, Ալ. Երիցյանի արխիվ, թղթ. 159, վավ. 117, թ. 3ա-3բ:

¹⁴ Մանրամասները տես Ալ. Երիցյան, նշ. աշխ., էջ 88-89:

¹⁵ ՄՄ, Ալ. Երիցյանի արխիվ, թղթ. 159, վավ. 117, թ. 3բ:

¹⁶ Անդ:

¹⁷ ՄՄ, Ալ. Երիցյանի արխիվ, թղթ. 159, վավ. 121, թ. 1ա:

ինչպես կտեսնենք, հաշորդող իրադարձությունները բոլորովին այլ իրավիճակի առջև կանգնեցրին թեմակալին, եւ նա արդեն ստիպված էր իր ողջ ուշադրությունը կենտրոնացնել Բեհբուլթյանների վրա:

Խորացող հակասությունների վերաբերյալ հետեւություններ կարելի է անել կաթողիկոսին ուղղված 1816 թ. հուլիսի 6-ի նամակից, որտեղ Ներսես Աշտարակեցին հանգամանալից կերպով անդրադարձել է ստեղծված բարդ իրավիճակի պատճառներին: Նամակի բովանդակությունից երեւում է, որ այդ պատճառների հիմքում նա առավելապես տեսնում էր թեմական եկամուտներին վերաբերող հարցերը: Այսպես՝ պարզվում է, որ «...Տէր Յակոբն (Նորաշեն եկեղեցու առաջնորդ.— Հ. Օ.) վախճանեալ եթող վասն թաղման իւրոյ 20 թուման ասեն, այլ վեց թուման յայնմանէ գուցէ դեռ ինքն կենդանի ետուն յաղագս հաստատելոյ զկտակ նորա», սակայն՝ «...բնաւ փարայ մի ոչ կամեցան մինչեւ ցայսօր մասնակցել արքեպիսկոպոսին, ընդ որում հոգեբաժին կամ այլ արդիւնք սովորականք»¹⁸: Ինչպես երեւում է, շատ դեպքերում տեղի հոգեւոր առաջնորդները սեփական հայեցողությունամբ են տնօրինել ստացված եկամուտները, որոնք այդպիսով չեն հասել ո՛չ առաջնորդարան եւ ո՛չ Մայր Աթոռ: Յավով արձանագրելով այդ փաստը՝ Ներսես Աշտարակեցին կաթողիկոսին է ներկայացնում այլ դեպքեր եւս. «...ի լինելն իմ ի Գորի, կին մի անյիշատակ վախճանեալ աստէն, խոստովանահայր քահանայն նորա գտունն եւ իբրեւ 40 թուման կոյսն կտակեալ ի վերայ երկուց ծանօթ կուսաց եւ ոչ ազգականց հանգուցելոյն»¹⁹: Այն, որ խոսքը մեծ գումարների մասին է, երեւում է հետեւյալ արձանագրումից. «Մին ազգականայ կնոջ վախճանեալ անօրէնութեամբ քահանային, կարծեմ թէ, աւելի քան 500 թուման կայք կերին նորա այլք եւ ցանկ մի ոչ ընկալայ ես կամ Հաղպատէն, որոյ էր վիճակ, եւ ոչ եւս Աթոռն», եւ, ինչն է հետաքրքիր, պարզվում է, որ տվյալ քահանան առաջադրվել է «...յուսով աշխարհականաց յորս յինումն զինեքինս կամ սրբօք կամ խնդրանօք»²⁰: Ահա թե ինչու թեմակալը ջանքեր էր գործադրում, որ Բեհբուլթյանները եւ մյուս իշխանները զերծ մնան հոգեւորականների նշանակելու միջամտությունից:

¹⁸ ՄՄ, Ալ. Նրիցյանի արխիվ, թղթ. 159, վավ. 126, թ. 3ա:

¹⁹ Անդ:

²⁰ Անդ, թ. 3բ:

Բնականաբար՝ Ներսես Աշտարակեցին չէր պատրաստվում հանդուրժել նման երեւոյթները, եւ այդ մասին նա անթաքույց գրում է Եփրեմ կաթողիկոսին՝ ասելով, որ ինքը վճռական է տրամադրված. «...խորտակել ամենայն ապստամբ կամաց հոգեւորականաց եւ մարմնաւորականաց իմոյ, յետ որոյ հետզհետէ մատուցել ի հնազանդութիւն ամենայն սանձարձակ քահանայք»²¹: Նման դիրքորոշմանը, անշուշտ, համառ դիմադրութեան էին ցույց տալու Թիֆլիսի հայ երեւելիները, եւ դուրին չէր լինելու լուծման հասնելը: Ուստի այդ հանգամանքով էր պայմանավորված բարեփոխումների հարցում հայոց հայրապետի անվերապահ աջակցութեանն ստանալու անհրաժեշտութիւնը²²:

Բ. ՌՈՒՍԱԿԱՆ ԻՇԽԱՆՈՒԹՅՈՒՆՆԵՐԻ ԴԻՐՔՈՐՈՇՈՒՄԸ.

ՆԵՐՍԵՍ ԱՇՏԱՐԱԿԵՑՈՒ ԴԻՄՈՒՄԸ ԿՈՎԿԱՍԻ ԿԱՌԱՎԱՐՁԱՊԵՏ
ՆԻԿՈԼԱՅ ՌՏԻՇՉԵՒԻՆ

1816 թ. հուլիսի 15-ին Բեհբուխյանների նախաձեռնութեամբ կազմվում է Եփրեմ Ա. Ձորագեղցուն ուղղված խնդրագիր, որը ստորագրողները խնդրում էին կաթողիկոսից, որպեսզի վերջինս հետ կանչի Ներսես Աշտարակեցուն եւ նրա փոխարեն նշանակի թեմի նոր առաջնորդ²³: Փաստացի դրանով խնդիրը դուրս է գալիս ներհամայնքային տիրույթից: Չենք կարծում, թե ստեղծված իրավիճակը կարող էր անակնկալ լինել Ներսես Աշտարակեցու համար: Համենայնդեպս՝ այդ քայլին ի պատասխան՝ նա շուտափույթ քայլեր է ձեռնարկում՝ ոռոսական իշխանութիւնների աջակցութեանն ստանալու ակնկալիքով:

1816 թ. հուլիսի 19-ին թեմակալ առաջնորդը ծավալուն գրութեամբ դիմում է Կովկասի այն ժամանակվա կառավարչապետ Նիկոլայ Ռտիշչեւին: Նախ՝ անդրադառնում է իր դեմ ուղղված դժգոհութիւնների պատճառներին. «Թիֆլիսում գտնվող Կոլեգիալ խորհրդական իշխան Դարչի Բեհբուխովը իմ նկատմամբ ուժեղ ատելութեամբ է լցված միայն նրա համար, որ ես հոգեւոր կոչում չեմ տալիս իր երաշ-

²¹ Անդ:

²² 1816 թ. հուլիսի 20-ին Եփրեմ կաթողիկոսը կոնգակով մերժում է ծխատիրութեան մասին ժառանգական իրավունքի գոյութիւնը (տե՛ս Մ. ԱՐՔ. ՕՐՄԱՆԵԱՆ, Ազգապատում, հտ. Գ., սյունակ 3953):

²³ Ա.Լ. ԵՐԻՑԵԱՆ, նշ. աշխ., էջ 106–107:

խավորած անարժան մարդկանց»²⁴.— գրում է Ներսես Աշտարակեցին: Անշուշտ, հոգեւոր գործերին միջամտելու հարցը դեռ կարելի էր համարել համայնքի ներքին խնդիր, սակայն, ինչպես պարզվում է նամակի հաջորդ տողերից, հայազգի իշխանը խոչընդոտներ է հարուցել նաեւ եկեղեցական գույքի հաշվառման խնդրում, ինչն արդեն ուղղակիորեն առնչվում էր ցարական իշխանությունների հետ. «...եւ նրա համար է ատում, որ ուժերիս ներածի չափով փորձում եմ կատարել Ռուսական կայսրությունում օտար դավանանքների գծով կառավարիչ իշխան Գոլիցինի պահանջները»²⁵.— եզրակացնում է թեմակալը: Մեր կարծիքով՝ Ներսես Աշտարակեցին այդ հանգամանքը հմտորեն է օգտագործել իր նպատակների իրագործման համար, որի արդյունքը պետք է լինեին ծխական «ինքնավարությունը» վերացնելը եւ ըստ այդմ՝ նյութական միջոցներն ի շահ թեմի եւ Մայր Աթոռի օգտագործելը: Ակնհայտ է, որ ռուս կառավարչապետի օժանդակությունն այդ հարցում կարող էր վճռորոշ լինել: Ներսես Աշտարակեցին նշում է, որ Դարչի Բեհրությունի ատելությունը մեղմելու իր բոլոր ջանքերն ապարդյուն են անցել: Ընդհակառակը՝ վերջինս իր կողմն է գրավել ազգականներին, որոնք բարձր պաշտոններ են զբաղեցնում կառավարման համակարգում²⁶:

Ներսես Աշտարակեցին Կովկասի կառավարչապետի ուշադրությունը հրավիրում է մեկ այլ կարեւոր փաստի վրա եւս. Բեհրությաններն ազգաբնակչության ստորագրությամբ խնդրագիր են ուղարկել հայոց կաթողիկոսին՝ անգամ բռնության դիմելով: Ավելին՝ նա ներկայացնում է ստույգ դեպքեր. «Քաղաքային ոստիկանության ջանքերով տներից եւ խանութներից հավաքում էին վաճառականների եւ արհեստավորների, ստիպում էին ստորագրել»²⁷: Այդպիսով՝ տեղական պաշտոնյաները միգուցե եւ ակամա, փաստորեն, աջակցել էին ստորագրահավաքին: Նամակի վերջում թեմակալ առաջնորդը հայտնում է եւս մի ուշագրավ տեղեկություն. «Իմ կյանքին վտանգ է սպառնում, ինչի համար խոնարհաբար խնդրում եմ պաշտպանել ինձ օրենքի ուժով»²⁸: Հավանո-

²⁴ ՄՄ, Կաթողիկոսական դիվան, թղթ. 29, վավ. 51, թ. 1ա:

²⁵ Անդ:

²⁶ ՄՄ, Կաթողիկոսական դիվան, թղթ. 29, վավ. 51, թ. 1ա:

²⁷ Անդ, թ. 1բ:

²⁸ Անդ, թ. 2ա:

րեն թեմակալ առաջնորդն ակնկալում էր, որ Ն. Ռտիշչենն անհապաղ միջոցներ կձեռնարկի:

Թեեւ վերոնշյալ նամակը լիովին բնութագրում է ստեղծված ծանր իրավիճակը, սակայն պետք է նշել, որ այն սպասված արդյունքը չի ապահովել²⁹: Ուստի Ներսես Աշտարակեցին փորձել է ավելի բարձր ատյանների դիմել:

Գ. ՆԱՄԱԿՆԵՐ ՌՈՒՍԱՀԱՅ ԳՈՐԾԻՉՆԵՐԻՆ.

ՀԱՐՈՒԹՅՈՒՆ ԱՐԱՐԱՏՅԱՆ ԵՒ ՀՈՎԱԿԻՄ ԼԱԶԱՐՅԱՆ

Խնդրին առնչվող ուշագրավ հանգամանքներ են բացահայտվում նաեւ ռուսահայ անվանի գործիչներին ուղղած՝ Ներսես Աշտարակեցու նամակներում, որոնցից հետաքրքրություն են ներկայացնում նամակները՝ ուղղված Հարություն Արարատյանին³⁰, որը «մուտք ուներ» նախարար Ալ. Գոլիցինի մոտ³¹:

Թեմակալը նամակներից մեկում, որ գրել է 1816 թ. օգոստոսի 6-ին, անդրադառնում է իր հոգեւոր առաքելության դժվարություններին եւ Բեհբուլյանների հետ հակասություններին՝ այդ ամենը պայմանավորելով ռուսական իշխանությունների պահանջներով. «...եւ յաղագս այսորիկ, երբ առաքեցաւ առ մեզ ի նորին պայծառափայլութենէ կնեազ Գօլիցինին յառաջադրութիւն վասն յօրինելոյ զտումարս եկեղեցեաց եւ եկեղեցականաց եւ ժողովրդոց Հայոց եւ ալոց: Յայսմ օրէ մինչեւ ցայսօր ժամանակի յայտնի յիսակալութեամբ չարացաւ նա (Դարչի Բեհբուլյանը. — Հ. Օ.) ընդ մեզ»³²: Սակայն հաշտվելու բոլոր ջանքերը, վրաց մետրոպոլիտի եւ Ն. Ռտիշչեւի միջնորդությունները անարդյունք էին մնացել³³: Ներսես Աշտարակեցին, որոշ մանրամասներ ներկայացնելով Հ. Արարատյանին իր դեմ ուղղված բողոքագրից, նշում է մի կարեւոր հանգամանք. ընդդիմադիրները քայլեր են ձեռնարկել նրա դեմ տրամադրելու նաեւ

²⁹ Տե՛ս В. Тунян, նշ. աշխ., էջ 91:

³⁰ Հարություն (Արտեմի) Արարատյանը կառավարական շրջանակներում հայտնի էր 1813 թ. Պետերբուրգում հրատարակած «Жизнь Артемия Арапатского» հուշագրությունով, որում արտացոլված են ժամանակի հայ իրականության եւ առօրյայի վերաբերյալ ուշագրավ մանրամասներ:

³¹ Թեեւ Ալ. Երիցյանն իր գրքում հիշատակել է այս նամակագրության մասին, սակայն բովանդակությանը չի անդրադարձել (տե՛ս Ա. ԵՐԻՑԵԱՆ, նշ. աշխ., էջ 98):

³² ՄՄ, Ալ. Երիցյանի արխիվ, թղթ. 159, վավ. 136, թ. 2բ:

³³ Ա. ԵՐԻՑԵԱՆ, նշ. աշխ., էջ 98:

Երեւանի խանին. «Բէհրուտեանք կրկնեալ իցեն զսարգարն, որ չէ ալժմ բարեկամ իմ», եւ շարունակում է. «...ոչ գո կարծիք, զի նա հարկադրէ զնորին Սրբազանութիւնն ի կատարումն կամաց Բէհրուտեանց»³⁴: Ահա թե ինչու էր հրատապ Ալ. Գոլիցինի միջամտությունը:

Ներսէս Աշտարակեցին մեկ այլ նամակ էլ գրել է 1816 թ. օգոստոսի 16-ին՝ նոր մանրամասնություններ ներկայացնելով համայնքի հոգեւոր գործերում տիրող ոչ բարվոք վիճակի վերաբերյալ: Նա գրում է. «Գտանին աստ ի քաղաքի կարծիմ աւելի քան զ10 պսակաւ ունեցող զկրկին կանայս, որք առանց եկեղեցական իրաւանց եւ ընդդէմ կանոնաց հայոց թողեալ զառաջինն պսակեալին ընդ այլում»³⁵: Այդ անկանոն երեւոյթը, փաստորեն, տարածված էր համայնքում, ինչը, սակայն, անընդունելի էր թեմակալի համար: Բայց միայն այդ հարցում չէ, որ համայնքն ընդդիմանում էր: Կրթության եւ լուսավորության գործում, ինչպես հայտնի է, Ներսէս Աշտարակեցին հեռուն նայող նպատակներ ուներ, եւ այդ նպատակների իրագործման համար անհրաժեշտ միջոցների հայթայթմանն ուղղված քայլերին եւս, ինչպես երեւում է, դիմադրություն են ցույց տվել վիրահայերը. «Ես ի բաց մոռացեալ հարկաւորսն վասն անձին իմոյ խնդրեցի յիշխանաց մեծս բանողաց ի վերայ իմ, զի ամենայն հարուստ տունքն ժողովրդեան իմոյ վիճակի տացին մի մի մանէթ արծաթ, ըստ իրաքանչիւր տանն միանգամ միայն եւ ես խոստացայ, զի ի Ռուսաստանէ, ի Հնդկաստանէ եւ յօսմանցւոց պատրաստեցից ի վերայ գումարելոցն յինքեանց 30 հազար ռուբլի մանէթ յաղագս կառուցանելոյ զհիմնաւոր ուսումնարան մանկանց հասարակութեան հայոց ի լեզու հայոց եւ ռուսաց», եւ գտնում է, որ «...մեծ պատճառ թշնամութեան ընդ իմ այս արարին ազգասէր հակառակորդքն իմ»³⁶: Այդպիսով՝ կրթական հարցերում եւս Ներսէս Աշտարակեցին ցանկանում էր Հ. Արարատյանի միջնորդությամբ ապահովել Ալ. Գոլիցինի աջակցությունը:

Նշենք, որ ռուսահայ իրականությանն առնչվող այդ կարեւոր հարցը չէր կարող չզբաղեցնել Լազարյանների ուշադրությունը, իսկ Ներսէս Աշտարակեցին չէր կարող զանց առնել նրանց աջակցությունն ստանալու հնարավորությունը³⁷: Ուշագրավ է Բեհրությանների հետ հակամարտու-

³⁴ ՄՄ, Ալ. Երիցյանի արխիվ, թղթ. 159, վավ. 136, թ. 4ա:

³⁵ ՄՄ, Ալ. Երիցյանի արխիվ, թղթ. 159, վավ. 141, թ. 1ա:

³⁶ ՄՄ, Ալ. Երիցյանի արխիվ, թղթ. 159, վավ. 141, թ. 1ա-1բ:

³⁷ Ալ. ԵՐԻՑՅԱՆ, նշ. աշխ., էջ 126:

Թյան հանգուցալուծմանը վերաբերող՝ 1817 թ. մայիսի 4-ի Ներսես Աշտարակեցու նամակը՝ ուղղված Հազարյաններին: Նախ կարեւորն այն է, որ Հազարյանները, փաստորեն, թեմակալից ակնկալել են անցյալում թողնել հակասությունները: Ընդամին՝ նամակում, հանգամանալից անդրադառնալով իրավիճակին, Ներսես Աշտարակեցին, կարծես, ընդառաջ է գնում Հազարյանների առաջարկած «խաղաղությանը», ավելին՝ վստահեցնում է, որ ինքն ի սկզբանե է խաղաղություն ցանկացել եւ ոչ պարզապես խոսքով, այլեւ իր քայլերով եւ դրա համար ամեն ջանք գործադրել է, թեեւ դրանք ապարդյուն են եղել. «Աշխատեցայ միշտ եւ ոչ կարողացայ համոզել զկամս Բէհրուտեանց ի փոյթ խաղաղութեան»³⁸: Նա գրում է նաեւ, որ զուր էին միջնորդութեամբ հաշտվելու փորձերը. «Զկնի առեալ ընդ իս զսրբազան Վառլամ մետրապօլիտն վրաց՝ տարայ առ դարձի Բէհրուտեան միջնորդ խաղաղութեան եւ ոչ նովաւ զնա կարողացայց համոզել»³⁹: Տեղական իշխանություններին դիմելը եւս անարդյունք էր. «... ապա առաքեցի զկուսակալ Ռտիշչենն, եւ ոչ նա զօրեաց զնա համոզել»⁴⁰: Թեմակալը նամակում տեղեկացնում է նաեւ, որ իրավիճակը փոխվել է Կովկասի նոր կառավարչապետի նշանակմամբ. «Նոր կուսակալ Ալէքսեյ Պետրովիչ Երմոլովն անձամբ զփոյթ կալեալ քննութիւն, անտէն ի սեփական տան իւրում կարգադրեալ զկամիսեայ»⁴¹, ինչի արդյունքում՝ «...ի 16 ամսեան ապրիլի ընկալաւ պօլիցիայն ի Բէհրուտեանց եւս եւ յայլոց յամենեցունց զձեռագրութիւնս յաղագս ոչ խառնելոյ այսուհետեւ ի գործս պատկանեալն հոգեւորականութեան»⁴²: Սակայն միայն այդ հարցում չէ, որ Ներսես Աշտարակեցին օգտվել է գեներալի բարեհաճությունից: Ինչպես երեւում է, նրա մտահոգությունն է եղել նաեւ հովանավորություն ստանալ Մայր Աթոռի համար⁴³: Այդ մասին նույնպես նա տեղեկացնում է. «...ինքն մեզ աստ խոստացաւ խօսել ընդ շահին՝ վասն ազատ եւ ապահով պահպանութեան Աթոռոյն»⁴⁴:

³⁸ ՄՄ, Ալ. Երիցյանի արխիվ, Թղթ. 159, վավ. 164, թ. 1բ:

³⁹ Անդ:

⁴⁰ ՄՄ, Ալ. Երիցյանի արխիվ, Թղթ. 159, վավ. 164, թ. 2ա:

⁴¹ Անդ:

⁴² ՄՄ, Ալ. Երիցյանի արխիվ, Թղթ. 159, վավ. 164, թ. 2բ:

⁴³ 1817 թ. Ա. Պ. Երմոլովի գլխավորությամբ ուսական դեսպանություն է մեկնում Պարսկաստան՝ սահմանային վիճելի հարցերի շուրջ բանակցություններ վարելու եւ համաձայնության գալու նպատակով:

⁴⁴ ՄՄ, Ալ. Երիցյանի արխիվ, Թղթ. 159, վավ. 164, թ. 3ա:

Նամակի վերջին տողերից պարզ է դառնում, որ Ներսես Աշտարակեցին խաղաղություն հաստատելուց հետո իր ամբողջ ուշադրությունը ցանկանում էր կենտրոնացնել ուսումնարան հիմնելու գործի վրա, թեպետ պետք է նշել, որ այդ կարեւոր նպատակի վերաբերյալ նա Հազարյաններին տեղեկացրել էր դեռ շատ ավելի վաղ՝ 1815 թ. հունիսին⁴⁵։ Սակայն մինչեւ դա իրականություն կդառնար, նա ուսանողների է երաշխավորում Հազարյան ճեմարանի համար⁴⁶։

Կարող ենք, իհարկե, Բեհբուխյանների հետ պայքարում արձանագրել Ներսես Աշտարակեցու հաղթությունը, սակայն խնդրահարույց էր մնում մի կարեւոր հարց. ինչ ուղիով պետք է ընթանային հետագա զարգացումները թեմում։ Այդ տեսանկյունից կարեւոր է 1817 թ. հուլիսի 13-ին Հ. Հազարյանին ուղղված նամակը, որում Ներսես Աշտարակեցին բացահայտում է իր բուն մտադրությունները, որոնք, փաստորեն, միտված էին միայն խաղաղություն հաստատելուն։ Ավելին՝ թեմակալ առաջնորդը գրում է, որ իր համար անընդունելի է որեւէ վրեժխնդրություն. «...յաղագս կենցաղավարութեան իմոյ ընդ իմոց հակառակորդաց լերուք քաջագէտ, զի չեմ ես վրէժխնդիր ոք կամ ատեցող կամ ոխակալ»⁴⁷։ Հետեւաբար նա ոչ միայն հաշտ դիրք բռնելու խոստում է տալիս Հ. Հազարյանին, այլեւ համագործակցության պատրաստակամություն է հայտնում. «...եւ թէ հանդիպեսցի կարիք ամենայն յօժարութեամբ նաեւ զամենայն բերարութիւն ոչ խնայիմ»⁴⁸։ Կարծում ենք, որ թեմակալի այդ մոտեցումը պայմանավորված էր նոր ուսումնարանի կառուցման գաղափարով, որի համար անհրաժեշտ էին ինչպես միջոցներ, այնպես էլ համայնքի աջակցությունը եւ մասնակցությունը։ Բայց, ինչպես երեւում է, այդ հարցում խոչընդոտները դեռեւս շատ էին։ Այդ առումով բնութագրական է թեմակալ առաջնորդի հետեւյալ միտքը. «Իմ ուսումնարանն, ի շնորհաց արգելողացն, տակաւին ի միտս իմ գտանի հիմնեալ»⁴⁹։

Այն մասին, որ Ներսես Աշտարակեցու՝ խաղաղություն հաստատելու վերաբերյալ հավաստիացումները պարզապես խոսքեր չէին, եւ նա որոշակի ջանքեր է գործադրել հաշտվելու ազդեցիկ Բեհբուխյաննե-

⁴⁵ ՄՄ, Ալ. Երիցյանի արխիվ, թղթ. 159, վավ. 88։

⁴⁶ ՄՄ, Ալ. Երիցյանի արխիվ, թղթ. 159, վավ. 164, թ. 3բ։

⁴⁷ ՄՄ, Ալ. Երիցյանի արխիվ, թղթ. 159, վավ. 169, թ. 1ա։

⁴⁸ Անդ։

⁴⁹ ՄՄ, Ալ. Երիցյանի արխիվ, թղթ. 159, վավ. 169, թ. 1ա։ Զարմանալիորեն Ալ. Երիցյանը այս տեղեկության տարեթիվը նշում է 1818 թ. (տե՛ս Ա. ԵՐԻՑՅԱՆ, նշ. աշխ., էջ 154–155)։

րի հետ, վկայում են արխիվային վավերագրերը: Այդ տեսանկյունից բավարար է միայն ծանոթանալ Հովսեփ Բեհբուլթյանին ուղղված նրա նամակին: 1816 թ. օգոստոսի 11-ին, այսինքն՝ երբ հակասությունները կիզակետում էին, թեմակալը փորձել է երկխոսության մեջ մտնել՝ պարզաբանելու համար, որ իր դեմ անհիմն մեղադրանքներ են տարածվում. «Հսեմ եմ, թէ ի մէջ անուականաց քաղաքիս հռչակեալ են ձայն, որպէս թէ ես մինիստրաց ոմանց կամ վեհազնեայ աղայ Յովակիմ Նղիազարեանին գրեալ իցեմ զգիր եւ անիծեալ եմ զհետեւողութիւն, որպէս թէ ազգն հայոց չլինիցի ճորտ ու մեք եւ իբրեւ թէ վասն այսմ պատճառի վիրաւորել գտանին»⁵⁰: Սակայն եթե նույնիսկ այդպես էր, եւ այդ ուղղությամբ թեմակալն ինչ-ինչ քայլեր էր ձեռնարկել, ապա, մերօրյա պատկերացումներով իհարկե, դա բացառապես վկայում է Ներսես Աշտարակեցու առաջադեմ հայացքների մասին: Սակայն հարցը մնում է առկախ. կարո՞ղ էր արդյոք իրատեսական այդ գործիչը ցարական ճորտատիրական համակարգի առկայության պայմաններում նման մտադրություն ունենալ: Կարծում ենք, որ հավանականությունը փոքր է: Դա է վկայում նաեւ Ներսես Աշտարակեցու զարմանքը, երբ նա գրում է, թե ինչպես է հնարավոր, որ «....զազգն իւրեանց (ռուսաց.— Հ. Օ.) թողուլ ի մէջ ճորտութեան հայոց եւ զազգն հայոց հանել ի ճորտութենէ ռուսաց, վրաց եւ հայոց»⁵¹:

Դ. ՊԱՐՍԿԱԿԱՆ ԻՇԽԱՆՈՒԹՅՈՒՆՆԵՐԸ.

ՆԱՄԱԿ ԵՐԵՒԱՆԻ ԽԱՆԻՆ

Ինչպես երեւում է, Բեհբուլթյանների հետ պայքարն այնպիսի զարգացումներ է ունեցել, որ Ներսես Աշտարակեցին ստիպված էր ջանքեր գործադրել Երեւանի խանի միջամտությունը կանխելու եւ մինչեւ անգամ՝ նրա բարեհաճությունն ստանալու համար, թեեւ հայտնի է նրա ռուսամետ կողմնորոշման մասին: Ինչպես արդեն նշել ենք, նա արդարացի մտավախություն ուներ, որ իր դեմ միջնորդություններ են ներկայացվում Երեւանի խանին⁵²: Բեհբուլթյանների նպատակը պարզ էր. օգտագործել խանի իշխանությունը, որպեսզի Եփրեմ կաթողիկոսը պաշտոնից

⁵⁰ ՄՄ, Ալ. Երիցյանի արխիվ, թղթ. 159, վավ. 138, թ. 1ա:

⁵¹ Անդ:

⁵² Ալ. Երեւան, նշ. աշխ., էջ 103:

հեռացնի թեմակալին: Հանգամանքների վերաբերյալ կարելի է եզրակացություններ անել Երեւանի խանին ուղղված Ներսես Աշտարակեցու նամակից, որը նա գրել է 1816 թ. նոյեմբերի 31-ին⁵³:

Դիտարկենք նամակում արժարժված կարեւոր փաստերը: Նախ հեռատես հոգեւոր գործիչն իր երախտագիտութունն է հայտնում խանին, որ վերջինս այդքան բարեհաճ է գտնվել Վրաստանից վերադարձող հայերի նկատմամբ՝ գրելով. «....ահա՛ կամեցողքն ի ժողովրդենն է իջմիածնի այժմ եկին եւ այլքն ամենայնիւ եւս արձակեալ գան ի գարնան յաջողմամբն Աստուծոյ»⁵⁴: Թեմակալ առաջնորդը հայ ազգաբնակչությանն աջակցելու նպատակով, իհարկե, իր գոհունակութունն է հայտնում իշխանութիւնների հովանավորութեան համար. «....եւ ես առաւել ուրախ եմ, վասն զի որպէս միշտ ի ժամանակս լինելոյ իմ ի ներքոյ բարերար հովանաւորութեան Ձեր»⁵⁵: Անդրադառնալով այն հարցին, որ իր դեմ զրպարտութիւններ են տարածվում, նա հավաստիացնում է, որ «....երբէք ես առաջի Ձեր կամ առաջի պարսից տերութեան ամենայն կառավարչաց ստութեամբ եւ անհարազատութեամբ չեմ վարեցեալ ոչ ինչ կերպիւ»⁵⁶: Պետք է նշել, որ Ներսես Աշտարակեցու այդ ջանքերն անտեղին չէին, քանի որ, թեեւ իր առաջնորդած Վիրահայոց թեմը ռուսական տիրույթում էր, սակայն Մայր Աթոռը շարունակում էր գտնվել պարսկական տիրապետութեան սահմաններում, իսկ վերջիններիս միջամտութիւնը կարող էր եւ որոշիչ լինել իր պաշտոնավարման հարցում:

Նկատենք, որ հստակ պատկերացնելով այդ իրողութիւնը՝ թեմակալն ուրիշ ելք չի ունենում, քան դիվանագիտորեն շրջանցել ռուսական իշխանութիւնների հետ ունեցած լավ հարաբերութիւնների հանգամանքը: Դրա համար նա փորձում է այլ տեսանկյունից մոտենալ հարցին՝ հիմնովին փարատելու համար պարսից պաշտոնյայի որեւէ կասկած. «....լաւապէս միամիտ լե՛ր, որ թէ ես կարողանամ Աթոռոյ աղազաւ արդիւնք ստանալ, չէ կարելի, որ ես Աթոռն զրկեմ եւ իմ անձն շահիմ միայն»⁵⁷: Իսկ իր դեմ ուղղված մեղադրանքները Ներսես Աշտարակեցին համարում է անհիմն բամբասանք, ինչը, ըստ նրա, չպետք է ան-

⁵³ Այդ ժամանակ Երեւանի խանն էր Հուսէյն խան Ղաջարը (1807–1827):

⁵⁴ ՄՄ, Ալ. Երիցյանի արխիւ, թղթ. 159, վավ. 152, թ. 1ա:

⁵⁵ Անդ:

⁵⁶ Անդ:

⁵⁷ ՄՄ, Ալ. Երիցյանի արխիւ, թղթ. 159, վավ. 152, թ. 1բ:

գամ արժանի լինի պարսից խանի ուշադրությանը. «Անբախտ եմ, որ իմ ճշմարտության մէջն վերստին բամբասողաց բամբասանքն լսում է Ձեր իմաստուն ականջն, առաւել անբախտութիւն իմ այն է, որ լռելայն զկնի հաւատ եւս կամենում է ընծայել բամբասողաց իմոց եւ զիս յետ հազար անգամ փորձելոյն ի մէջ իմ անշարժ հաւատարմութիւնն դարձեալ մեղադրութիւն է արժանացուցանում»⁵⁸: Վերջում թեմակալը նրբանկատորեն փորձում է ապավինել խանի հովանավորությանը՝ նամակը եզրափակելով հետեւյալ տողով. «...Ձեր խնամքն եւս չպակասեցէ ինձ»⁵⁹:

Հաշվի առնելով այն, որ պարսկական իշխանություններն առանձնապես շահագրգռվածություն չունեին այդ հարցում, կարելի է ենթադրել, որ այս նամակը դրական է ընդունվել Երեւանի խանի կողմից:

ԵԶՐԱԿԱՑՈՒԹՅՈՒՆ

Ամփոփելով նշենք, որ Մատենադարանի արխիվային վավերագրերը կարելոր հանգամանքներ են բացահայտում այն մասին, թե Ներսես Աշտարակեցին ինչպիսի գործուն քայլերի է դիմել Բեհբեկյանների հետ հակամարտությունը լուծելու եւ համայնքի պառակտումը վերացնելու ուղղությամբ: Դրա նպատակը թեմի առաջնորդի համար ինքնուրույնության ապահովումն էր ինչպես հոգեւոր գործերում, այնպես էլ եկամուտների տնօրինման հարցում: Վերջին իրողությունը, կարծում ենք, կարելոր եւ նպաստավոր դեր է կատարել տարիներ անց Թիֆլիսում Ներսիսյան դպրոցի հիմնադրման գործում:

ՀԻՄՆԱԲԱՌԵՐ

Մատենադարան, Ալեքսանդր Երիցյանի արխիվ, Կաթողիկոսական դիվան, թիֆլիսահայ համայնք, եկեղեցական հասույթներ, Ներսես Աշտարակեցու նամակները, Կովկասի կառավարչապետ, Լազարյաններ, ռուսահայ գործիչներ:

⁵⁸ Անդ:

⁵⁹ Անդ, թ. 2ա:

РЕЗЮМЕ

Противостояние предводителя Грузинской епархии Армянской Апостольской Церкви Нерсеса Аштаракеци (1814–1828., с 1843 по 1857 – Верховный Патриарх и Католикос всех Армян) и влиятельной семьи тифлисских армян – князей Бейбутянов – имело значительное отражение в жизни современных им армян, а решение данного противостояния имело важнейшее значение для армянской общины. Документы в архивах Матенадарана, в которых представлены богатые источниковедческие документальные материалы, выявляют ряд новых обстоятельств, касающихся данного противостояния, дают важные сведения из первоисточников относительно данного вопроса и дополняют общую картину противостояния.

Исследование писем, адресованных Католикосу всех Армян Епрему I Дзорагехци, главнокомандующему Николаю Ртищеву, русско-армянским деятелям Арутюну Арапатьяну и Екиму (Овакиму) Лазареву, также как и Ереванскому хану Хусейну, выявляет активные усилия Нерсеса Аштаракеци, целью которых являлось стремление упорядочить дела епархии, устранить противостояние и привести епархию к миру. На этом непростом пути предводителю удалось преодолеть многочисленные препятствия, даже опасность для своей жизни.

Именно вследствие подобных действий предводитель Грузинской епархии Армянской Апостольской Церкви приобретает самостоятельность в управлении духовных вопросов и в расходовании денежных средств епархии. Последнее обстоятельство через года сыграло очень важную и значительную роль в процессе основания знаменитой Нерсисянской школы в Тифлисе.

SUMMARY

The conflict between Nerses of Ashtarak (1814–1828, Catholicos of All Armenians 1843–1857), Primate of the Armenian Diocese of Georgia, and Behboutians, the influential family of Tiflis Armenians, had a vast impact on the Armenian reality of the time, and the solution of this confrontation was of paramount importance for the Armenian community.

The documents in the archives of Matenadaran, which present rich source documentary materials, reveal a number of new circumstances regarding this

confrontation, provide important information from primary sources regarding this issue and complement the overall picture of the confrontation.

The study of letters addressed to the Catholicos of All Armenians Yeprem I of Dzoragegh, the Russian governor Nikolay Rtishchev, the Russian-Armenian figures Harutyun Araratyan and Hovakim Lazaryan, and Huseyn Khan of Yerevan, reveals the active efforts of Nerses o Ashtarak, who also aimed to regulate spiritual affairs through reforms, eliminate confrontation and bring the diocese to peace. On this difficult path, the Primate of the Diocese overcame many obstacles, up to the danger threatening his life.

Nevertheless, thanks to these activities, the Primate of the Armenian Diocese of Georgia attained independence in the management of spiritual affairs and in the administration of the Diocese's funds. The latter circumstance years later played a very important and significant role in the process of founding the famous Nersisyan School in Tiflis.

